

歷代史表



甬上萬季野先生著

歷代史表

留香閣藏板

欽定四庫全書提要

臣等謹案歷代史表五十三卷

國朝萬斯同撰斯同字季野鄞縣人是書以十七史自後漢書至五代史惟新唐書有表餘皆闕如故各爲補撰宗史記前漢書之例作諸王世表外戚侯表外戚諸王世表異姓諸王世表將相大臣及九卿年表宗新唐書之例作方鎮年表諸鎮年表其

宦者侯表大事年表則斯同自創之例也
其書自正史本紀志傳以外叅考唐六典
通典通志通鑑十府元龜諸書及各家雜
史次第彙載使列朝掌故端緒釐然於史
學殊爲有助考自宋以前惟後漢書有熊
方所補年表他如鄭樵通志年譜僅記一
朝大事及正閏始末其於諸王諸將相公
卿大臣興廢拜罷之由率畧而不書近人

作十六國年表亦多舛漏其網羅繁富類聚區分均不及斯同之賅備惟晉書旣補功臣世表則歷代皆所當補十六國如成趙燕秦旣有將相大臣年表則十國如南唐南漢北漢閩蜀不當獨闕又魏將相大臣中不載上大將軍五代諸王世表獨闕後漢注謂後漢子弟未嘗封王然考承訓追封魏王承勳追封陳王與後周郟杞越

吳諸王事同一例何以獨削而不登是皆
其偶有脫畧者然核其大體則精密者居
多亦所謂過一而功十者矣
乾隆五十一年五月恭校上

總纂官

臣

紀

昀

臣

陸錫熊

臣

孫士毅

序

自科舉之學盛而史學遂廢昔蔡京蔡卞當國
欲絕滅史學卽資治通鑑板亦議毀之然而不
能今未嘗有史學之禁而讀史者顧無其人由
是而歎人才之日下也憶今十九二十歲時讀
二十一史每日丹鉛一本遲明而起雞鳴方已
蓋兩年而畢然付性魯鈍一傳未終已逃其姓
氏者往往有之朱子云思慮計畫者魂之爲也

記憶辨別者魄之爲也固知余之魄弱也先忠
端公就逮時途中謂某曰汝近日心麤不必看
時文且將架上獻徵錄涉略可也自後三年始
讀二十史因先公之言也夫二十一史所載
凡經世之業亦無不備矣然其間缺略甚多司
馬遷創爲本紀志表列傳諸史皆因之後漢卽
有志而無表三國表志並無矣以南朝而言晉
宋齊梁陳皆無表梁陳并無志也以北朝而言

魏齊周隋皆無表齊周并無志也唐之志表極
詳五代旣無表而司天職方二考則律歷五行
地理三志之略其他不能及宋遼金元志表俱
備然據所可考者作表不計詳略豈非讀史者
之憾乎是故杜氏通典鄭樵通志文獻通考皆
足以補史志之缺文而補表者古今以來無其
人也宋謝翱嘗采獨行作秦漢之際月表今亦
亡矣卽以志而論傳世久遠亦多錯誤如漢律

歷志統母誤爲統法見日法誤爲月法見月日
法誤爲日法至於除法尤爲錯亂余推冷州鳩
七律方爲之改正後漢律歷志所列元紀部章
之法以鑿度較之大槩不合同出於四分而
鑿度可推歷志不可推其爲誤也多矣四明萬
季埜吾友履安先生之少子也先生以文章風
節高天下而季埜克繼之其讀書五行並下弘
羊潛計安世默識季埜準之誠不足怪而尤熟

於明室之典故會修明史當事諸公無不咨其
博洽嘗慨二十一史多無表乃悉從而補之得
六十卷誠不朽之盛事大有功於後學者也余
憶崇禎己巳於陳睂公坐上遇許子洽有明館
閣九卿年表初成見之以爲奇書此不過目前
一代之考索而季埜能追考於千載之上豈不
謂尤奇耶余向讀史時嘗有意爲斯事忽忽未
果嘉季埜之克成余志也故爲敘之如此

康熙壬申歲季秋姚江黃宗羲太沖譔

序

太史公撰史記上自黃帝至本朝人以並時異
世年差不明作十表內分爲世表年表月表班
氏撰漢書稍變其體作八年表然蘭臺耑述本
朝而乃更次第古今人物此則可已也及范蔚
宗作後漢書所注意惟在列傳諸論贊雖八志
尙謂不盡前此撰東漢二十二家亦惟邊韶崔
寔嘗有百官表蔚宗亦改爲百官志而表遂闕

焉陳壽而下卽志猶未備至唐書始復作表然其所載大臣世系哀然數卷於國史中詳作宰相家乘亦何謂也後五代書復無表宋司馬文正公旣作通鑑亦以編年之書雜記衆國事差次不齊已倣太史公年表例采其大事精語年經月緯作爲目錄三十卷而後史家之事備焉吾友萬履安先生以文章節義領袖東南有子八人皆好學而少子季野尤穎異甫總角輒能

讀父書弱冠時愾後漢書無表因補作諸王功臣世表外戚宦官侯表及將相大臣九卿年表凡四篇自後遂遍作三國晉宋齊梁陳魏北齊周隋下及五代凡六十篇而他僭竊諸國亦附見焉季野于史學可謂勤矣夫蘭臺生於東漢去西京不遠本朝文獻方策未亡然其王子侯表尙有失書侯所食邑名者某人嗣不具年月者百官表有姓名不具者失載遷免者俱爲史

之闕文今季野生千載而後惟從故籍中精覽
詳稽心通本末定其世次歲月以補前人所未
有其事益難太史公論作史之法一曰深思一
曰深考益從來著述家未有不審於經營慎於
證辨而能成一家之書者也季野生習於有明
三百年文獻又嘗作開國以後至監國行朝功
臣將相內外諸大臣年表以備史官採錄適季
野生修吾鄉郡乘先覽舊書諸列傳見所載某年

先輩爲某官行事季野隨覽隨判其上曰是年
某月此公已遷去代者爲某何得以甲冒乙如
是甚多他人覆驗之不爽月日季野第六兄充
宗博通經學每讀一經輒盡集古今先儒諸說
擇其言尤精者率蚊脚細書歲積至十餘卷所
誤儀禮商周官辨非春秋私說諸書爭爲學者
傳錄萬氏兄弟於經史之學若此其視今世學
者爲何如也